

## Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

## फिलेमोन क पत्र

१ ईसू मसीह क बरे बन्दी बना पौलुस अउर  
१ हमार भाई तीमुथियुस कईती स:

हमार प्रिय दोस्त अउर सहकर्मी फिलेमोन,  
२ हमार बहिन अफफिया, हमार साथी सैनिक  
अर्खिप्पुस अउर तोहरे घरे पर एकट्ठा होइवाली  
कलीसिया क:

३ उ हमार परमपिता परमेस्सर अउर परभू ईसू  
मसीह कईती स तोहे पचन क अनुग्रह अउर  
सान्ति मिलइ।

फिलेमोन क प्रेम अउर बिसवास

४ आपन पराथना मँ तोहार उल्लेख करत भए  
मई हमेसा अपने परमेस्सर क धन्यवाद करत हउँ।

५ काहेकि मई संत जनन बरे तोहरे ओई प्रेम अउर  
बिसवास क चर्चा सुनत हउँ, जो परभू ईसू अउर  
समस्त पवित्र लोगन क प्रति अहइ। ६ मोर  
पराथना बा कि तोहरे बिसवास स पइदा उदार  
सहभागिता लोगन क मार्ग दरसन करइ। जेहसे  
ओन्हे सभन अच्छी चीजन क गियान होइ जाइ  
जउन मसीह क उद्देश क आगे बढ़ावइ मँ हमरे  
बीच घटन होत रहिन बाटिन। ७ हे भाई, तोहर  
कोसिसन स संत जनन क हिरदइ हरा-भरा होइ ग  
हयेन, इही बरे तोहरे प्रेम स मोका बहुत आनन्द  
अउर प्रोत्साहन मिला बा।

उनेसिमुस क भाई स्वीकारा

८ इही बरे मई बिसवास करत हउँ कि मसीह  
मँ मोका तोहरे कर्तव्यन क बारे मँ हुकुम देइ क  
अधिकार बा ९ मुला प्रेम क आधार पर मई तोहसे  
निवेदन करब ही ठीक समझत हउँ। मई पौलुस  
जउन अब बूढ़ाइ होइ चला हउँ अउर मसीह ईसू  
क बरे अब भी बंदी बना हुआ हउँ। इही उचित  
अहइ कि तोहसे सबन स आग्रह करउँ। १० मई उ  
उनेसिमुस क बारे मँ निवेदन करत हउँ, कि जउन  
जब तब मोर धरम पुत्र बना रहा जेकर मई बंदी  
गृह मँ रहेउँ। ११ एक समइ रहा जब उ तोहरे कउनउ  
काम क नाही रहा, मुला अब न केवल तोहरे बरे  
बल्कि मोरे बरे भी उ बहुत काम क अहइ।

१२ मई ओका फिन स तोहरे लगे भेजत  
हउँ (बल्कि मोका तउ कहइ चाही अपने हिरदइ क  
ही तोहरे लगे भेजत हउँ) १३ मई ओका इहाँ अपने  
लगे ही रखइ चाहत रहेउँ, ताकि सुसमाचार क बरे  
मोह बन्दी क उ तोहरी तरफ स सेवा कइ सकइ।  
१४ मुला तोहरी आज्ञा क बिना मई कछू भी करइ  
नाही चाहित ताकि तोहार इ भलाई दबाव स नाही  
बल्कि स्वेच्छा स ही होइ।

१५ होइ सकत ह कि ओका थोड़े समइ क बरे  
तोहसे दूर रहइ क कारण इहइ होइ कि तू ओका  
फिन हमेसा बरे पाइ ल्या। १६ दास क रूपे मँ नाही,  
बल्कि दास स जियादा एक प्रिय बन्धु क रूपे मँ  
मई ओसे बहुत प्रेम करत हउँ किन्तु तू ओका  
अउर जियादा प्रेम करव्या। केवल एक मनुष्य क  
रूप मँ ही नाही बल्कि परभू मँ स्थित एक बन्धु क  
रूपे मँ भी।

१७ तउ यदि तुम मोका आपन दोस्त क रूप मँ  
स्वीकार करत ह, तब उनेसिमुस क वापस स्वीकार  
कइ ल्या। ओकर ऐसा सुआगत करा, जैसा कि तुम  
मोर सुआगत किहा ह। १८ अउर अगर उ तोहार  
कउनो प्रकार स हानि पहुँचाए स अथवा कउने  
वस्तु बरे तोहार कर्जादार अहइ। तउ ओका हमरे  
खाता मँ लिख द्या। १९ मई पौलुस खुद आपन  
दस्तखत स इहइ लिखत हउँ। ओकर भरपाई  
तोहका मई करबइ। मोका इ बतावइ क जरूरत  
नाही बा कि तोर सम्पूर्ण जीवन ही मोर ऋणी बा।  
२० हँ भाई मोका परभू मँ तोहसे इ लाभ पहुँचइ कि  
मसीह मँ मोर हिरदय हरा भरा होइ जाइ। २१ तोह  
पइ बिसवास रखत इ चिट्ठी मई तोहका लिखत  
हउँ। मई जानत हउँ कि तोहसे मई जेतना कहत  
हउँ, तू ओसे कहुँ जियादा करव्या।

२२ साथ ही मँ मोरे बरे निवास का भी प्रबन्ध  
करा, काहेकि मोर आसा अहइ कि तोहार सब  
पराथना क परथनावन द्वारा मई तोहका सौंप  
दिया नाउँ।

अन्तिम उपहार

२३ मसीह ईसू मँ रहई क मोर साथी बन्दी  
इपफरास क तोहे सबन क नमस्कार। २४ मोर  
साथी कार्यकर्ता मरकुस, अरिस्तर्खुस, देमास अउर  
लूका क तोहे नमस्कार पहुँचइ।

२५ परभू ईसू मसीह क अनुग्रह तोहरे आतिमा  
क साथ रहइ।